

四庫全書

經部

欽定四庫全書

慈湖詩傳卷六

宋 楊簡 撰

王

彼黍離離彼稷之苗行邁靡靡中心搖搖知我者謂我心憂不知我者謂我何求悠悠蒼天此何人哉彼黍離離彼稷之穗行邁靡靡中心如醉知我者謂我心憂不知我者謂我何求悠悠蒼天此何人哉彼黍離離彼稷之實行邁靡靡中心如噎知我者謂我心憂不知我者

謂我何求悠悠蒼天此何人哉

穗音遂噎說文以壹得聲 曲禮曰稷曰明粢郭璞

云今江東人呼粟為粢遠望茫茫似黍離離又似稷
苗穗故曰彼黍離離耶彼稷之苗也行邁見之為之
靡靡遲遲中心搖搖憂傷莫能去李曰呼天而慙曰
致此者何人哉舍蓄其辭不欲指斥其人也毛詩序
云黍離閔宗周也周大夫行役至於宗周過故宗廟
宮室盡為禾黍閔周室之顛覆彷徨不忍去而作是

也

君子于役不知其期曷至哉雞棲于埘日之夕矣羊牛
下來君子于役如之何勿思君子于役不日不月曷其
有佺雞棲于桀日之夕矣羊牛下括君子于役苟無飢
渴

毛傳曰鑿牆而棲曰埘爾雅釋宮云雞棲于杙為桀
鑿垣而棲為埘郭云今寒鄉穿牆棲鷄皆見詩杙牒
也鷄猶歸棲羊牛猶下來君子于役而不歸佺會也

括者羊牛歸宿之所必有檢括防閑朱曰君子行役
之久不可計以日月而又不知其何時可以來會也
徒念君子終無歸期至是末如之何惟曰君子苟無
飢渴亦庶幾爾毛詩序曰君子于役刺平王也君子
行役無期度大夫思其危難以風焉君不可以言刺
而況于王乎是詩婦人思念其君子而已初無刺王
之意衛宏不知道不知婦念其君子之心非邪僻之
心即道心故外推其說殊為害道又何以知其非婦

人作而必曰大夫作耶

君子陽陽左執簧右招我由房其樂只且君子陶陶左執翽右招我由教其樂只且

是詩君子遭亂相與隱遯仕於伶官苟祿逃責君子之所憂者懼其失道而已今既逃責可以無愧故樂也陽陽陶陶皆樂之貌孔疏云簧者笙管之中金薄鑠也郭璞云大笙十九簧小笙十三簧月令仲夏調竽笙箎簧則簧似別器孔疏謂三器皆有簧非別器

也鹿鳴云吹笙鼓簧言吹笙則鼓簧是簧之所用本
施於笙笙師掌教敎竽笙塤箛簫簟篪簫管而不言簧
鄭司農云竽三十六簧鄭志云路寢房中可用男子
毛傳曰翽翽也翽也鄭箋云翽舞者所持謂羽舞也
右手招我俱在樂官也招之者豈慮其未知而失期
耶抑以其新進故導之耶敎者謂舞位毛詩序曰君
子陽陽閔周也君子遭亂相招為祿仕全身遠害而
已本詩初無閔周之意乃衛宏自起意說相招為祿

仕亦在平時亦非此詩之情章句儒不知道率好穿鑿不知日用平常之即道故曲推外說

揚之水不流束薪彼其之子不與我戍申懷哉懷哉曷月予還歸哉揚之水不流束楚彼其之子不與我戍甫懷哉懷哉曷月予還歸哉揚之水不流束蒲彼其之子不與我戍許懷哉懷哉曷月予還歸哉

其如字或作記者方音轉訛也 激揚其水勢力甚

弱雖束薪不能流令之不行者似之彼其之子不與

戍申彼子乃令之不至不往戍者也今俗亦有此等語與猶為也其令侯國往戍而不從故使畿民而民怨歟抑令更戍者不從也歟久戍者怨歟抑久戍者思歸而怨因以譏王政之不均亦有令之不從不與我同戍申甫許歟東薪易於流行而今不能流之則其令非强大者以薪蒲為說懷哉懷哉曷月予還歸哉思歸心也楚亦薪之異名漢廣云翹翹錯薪言刈其楚毛傳云蒲草也鄭箋云蒲蒲柳孔疏云陸璣疏

云蒲柳有兩種皮正青者曰小楊其一種皮紅者曰大楊皆可以為箭幹故春秋傳曰董澤之蒲可勝既乎今又以為箕籩之楊也尚書有呂刑之篇禮記引之皆作甫刑孔安國云呂侯後為甫侯周語云祚四岳為侯伯賜姓曰姜氏曰有呂又曰申呂雖衰齊許猶在是申與甫許同為姜姓平王母家申國所成唯應成申不戌甫許也言甫許者以其同出四岳俱為姜姓既重章以變文因借甫許以言申其實不戌甫

許也六國時秦趙皆伯益之後同為嬴姓史記漢書
多謂秦為趙亦此類也簡思毛詩序曰揚之水刺平
王也不撫其民而遠屯戍于母家周人怨思焉言刺
非申在今鄧州南陽縣呂在今蔡州新蔡縣許在今
潁昌府為許昌郡即唐許州

中谷有推嘆其乾矣有女仳離嘅其嘆矣嘅其嘆矣遇
人之艱難矣中谷有推嘆其脩矣有女仳離條其獻矣
條其獻矣遇人之不淑矣中谷有推嘆其濕矣有女仳

離啜其泣矣啜其泣矣何嗟及矣

補音脩式竹切釋名腊脯又名脩縮也莊子脩然而往脩然而來亦式竹切釋文一作蔣歎息六切集韻吹氣若歌說文嘯从口肅聲又云籀文嘯從欠爾雅釋草云萑推郭云荒蔚也李曰臭穢草也妻為夫所棄故以臭穢之草自況不見親於夫也陸璣疏云舊說及魏博士周元明皆云菴間是也韓詩及三蒼說悉云益母本草荒蔚一名益母劉歆曰推臭穢即

荒蔚也谷中多水推生其中宜水之草也今遇旱暵則乾矣其修茂者暵燥矣初濕者今暵矣宜水之草今遇暵乾其失所之狀可觀矣曰遇人之艱難則知饑饉然有貧困不因饑饉者又曰不淑則知士德之薄豈有君子困窮而棄其妻乎毛詩序曰中谷有推閔周也夫婦日以衰薄凶年饑饉室家相棄爾毛傳曰仳別也說文云歎吹聲也條者其歎音之長而似條歟吸者淚流下入口也詩中初無閔周之情衛宏

贅辭也惡不淑正也憂苦非邪也宏不達無邪平正之道故多贅說

有兔爰爰雉離于羅我生之初尚無為我生之後逢此百罹尚寐無吪有兔爰爰雉離于罟我生之初尚無造我生之後逢此百憂尚寐無覺有兔爰爰雉離于罟我生之初尚無庸我生之後逢此百凶尚寐無聰

毛傳曰爰爰緩意鳥網為羅兔有小人之狀雉文明

比君子

按樓鑰云雉非為其文明也羅之設所以取鳥獸兔狡如小人爰爰緩行不至觸冒雉性

耿介多懼其中世亂周密小人多幸
免而君子多陷于罪言文明則意差
小人得志而暇

逸而君子懼禍患離麗也附麗于羅網其懼禍患似
之君子以雉自比我生之初尚無所為言無事及我
生之後逢此憂離禍患之多願寐無叱寐而作訛謬
之音則必寤矣欲無叱者欲無寤也寤則又憂苦矣無
覺無聰其意同聰聞寐中有所聞則覺矣爾雅釋器云
縶謂之量量覆也覆謂之罩罩覆車也郭注云今之翻車
也有兩轅中施罽以捕鳥孫炎曰覆車網可以掩兔

者也一物五名庸用也猶為也造也是詩憂苦無聊
雖有隱怨無敢著明是詩無邪孰非道心毛詩序曰
兔爰閔周也桓王失信諸侯背叛敗節容有此事序
多誤亦不可深信然孔子取此詩之道心雖無此序
亦可而序文贅反足以亂道心

繇繇葛藟在河之漘終遠兄弟謂他人父謂他人父亦
莫我顧繇繇葛藟在河之茨終遠兄弟謂他人母謂他
人母亦莫我有繇繇葛藟在河之漘終遠兄弟謂他人

昆謂他人昆亦莫我聞

葛與藟釋見樛木餘餘蔓延不絕也葛與藟在河之
許綿綿不絕今也人而不如之故以況也人誰無過
覲其終改今終不改終棄遠其兄弟反謂他人為父
而親之亦莫我顧言其畧不相顧言其甚也尚不相
顧何望其相親毛詩序曰葛藟王族刺平王也周室
道衰棄其九族焉釋文作刺桓王曰本亦作刺平王
案詩譜是平王詩皇甫士安以為桓王之詩崔靈恩

集注本亦作桓王桓平不必深辨其譏遠兄弟則明
矣譏邪非邪雖怨而正道也觀揚之水序言平王不
撫其民而遠屯戍于母家與此詩亦相應爾雅釋水
云許水厓釋邱云洙為厓夷上洒下不濬岸上許郭
璞曰洒深也不發聲洒即洗字為水所洗故深歟或
瀉之音而訛歟俗謂峻下曰瀉不殆衍字釋親云梟
兄也梟即昆字稱他人為母稱他人為兄而不親我
何止於不親我如無我焉故曰亦莫我有不相聞不相

報知故曰亦莫我聞凡百尚不相聞而況於厚禮乎

彼采芣兮一日不見如三月兮彼采蕭兮一日不見如三秋兮彼采艾兮一日不見如三歲兮

蕭補音疎鳩切

按原本此六字脫

楚辭九歌蕭與憂叶又九

嘆蕭與愁叶艾補音魚刈切

按原本此三字脫

說文以艾得

聲尚書又用三德從作又又時暘若漢書皆作艾無作牛盖切者 熟觀采芣之詩朋友相好有如此者人情相愛相念之篤誠有此相好相念非邪非僻非道

而何毛衛不知平正無邪之即道遂曲推其義以為
懼讒既不知何世何人則意之而已意之而曲推穿
鑿以為懼讒言之入亦可笑矣爾雅釋草云蕭荻李
巡曰荻一名蕭陸璣云今人所謂荻蒿者是也或云
牛尾蒿似白蒿白葉莖鹿藿科生多者數十莖可作燭
有香氣故祭祀以脂熟之為香許慎以為艾蒿非也

按釋草云以下原本
缺今從正義補入

大車檻檻毳衣如茨豈不爾思畏子不敢大車噶噶

衣如璫豈不爾思畏子不奔穀則異室死則同穴謂予不信有如皦日

穴補音戶橘切說文鳩以穴得聲淮南子水居窟穴

人民有室

按原本脫此二句

三畧主任舊齒萬事乃理主聘若

穴士乃得實易林乾之咸曰三人求橘反得丹穴需之觀曰河水孔穴壞敗我室震之蹇曰蟻封戶穴天雨將集孔融詩猿穴與不密叶春官司服子男之服自毳冕而下卿大夫之服自元冕而下大夫出封

畿內諸侯則加等服子男之服或子男入仕王朝毳
衣者乘車以出決男女之訟淫者雖畏而止息而情
終不忘他日相遇相語有此詩人述而為之詩所以
譏笑也故人傳而盛行官得而采之故曰詩無邪言
大車檻檻毳衣如茵則當時決訟事狀著矣蒺藜初
生毳服內之青色如之璫玉赤色毳服內之赤色如
之毳衣績裳繡有五色馬子謂毳衣而決訟者穀善
也今俗謂無病故曰安善故此詩謂生曰穀他日男

女忽遇而陳情曰豈不爾思畏子而不敢詩人敷暢其辭故又曰嘖嘖又曰如璫又曰不奔陳情之切有曰生則異室不得而合矣死必同穴以葬若謂予言未必信有如皎日所以誓也夫人欲方熾故有此退而休止心自知非何敢形於詩言聞于外故人得而歌之為笑也周衰淫風雖流行而公論終難磨滅以人性善終不磨滅也是詩情狀非陳古毛傳亦不曰陳古獨衛宏序曰陳古刺今大夫不能聽男女之訟

治古無淫俗安有同穴之誓衛序非毛傳曰檻檻車
行聲也噶噶重遲

丘中有麻彼留子嗟彼留子嗟將其來施施丘中有麥
彼留子國彼留子國將其來食丘中有李彼留之子彼
留之子貽我佩玖

嗟補音遭哥切

按此三字
原本脫

邊讓章華賦嗟與波叶阮

籍詠懷詩嗟與河叶郭璞江賦嗟與阿叶陸機詩亦

然施詩戈切

按此三字
原本脫

楚辭天問安施與伊何叶漢

高祖戚夫人歌施與何叶麥音默國補音越逼切

按此三字

原本脫

博古圖周南宮鼎光相南國周穆公鼎南國東國

皆作或說文或邦也孫恂于逼切徐鍇曰俗作古獲切
玖補音舉里切說文正引此詩而讀如芭 毛傳曰留

大夫氏子嗟字也子國子嗟父鄭箋云子嗟放逐言子
國著其世賢施施自適之貌言子嗟將自適于邱園之
中矣將來食邱中之麥矣食其李矣初去朝未至邱
中故曰將其來詩人留子之親故故貽我佩玖而別

也維親故熟知留子邱園有麻麥李古人亦有以一字字者如顏淵冉有曰嗟曰國其字歟毛傳謂子嗟子國則句不文後世未有以嗟類為字然古者名字子賤子騫仲突仲忽則嗟亦其類爾顏回字淵又字子淵則留子或果字子嗟子國是詩蓋惜留子之賢而見退黜念之也衛宏序曰莊王不明賢人放逐

鄭

緇衣之宜兮敝予又改為兮適子之館兮還予授子之

粲兮緇衣之好兮敝予又改造兮適子之館兮還予授
子之粲兮緇衣之蓆兮敝予又改作兮適子之館兮還
予授子之粲兮

按此篇永樂
大典缺卷

將仲子兮無踰我里無折我樹杞豈敢愛之畏我父母
仲可懷也父母之言亦可畏也將仲子兮無踰我牆無
折我樹桑豈敢愛之畏我諸兄仲可懷也諸兄之言亦
可畏也將仲子兮無踰我園無折我樹檀豈敢愛之畏

人之多言仲可懷也人之多言亦可畏也

檀補音徒汾切

按此三字原本脫

易林臨之蹇手詘不便不能

伐檀便毗連切張衡南都賦楮牙枿櫨挾拓攄檀結根聳

本垂條嬋媛

按南都賦以下原本脫

將請也請音輕清而高者

也故立此字以寄音今方言有之毛詩序曰將仲子刺莊公也弟叔失道而公弗制祭仲諫而公弗聽小不忍以致大亂焉而詩無刺意是詩莊公所為也誠有不忍殺其弟之意祭仲諫曰臣請除之故是詩曰無折我樹

杞無折我樹桑無折我樹檀我云者親愛之真情也曰
豈敢愛之其情實愛也今人實愛而曰不敢愛者每有
是言曰畏父母畏諸兄畏人之多言此畏忌之心非慢
易之心也夫不忍殺其弟之心畏忌之心此即道心而
序以為刺近世蘇氏亦推及他日隱微未著之情與夫
其後欲殺其弟之心而盡掩是詩之善不可人心本善
本正人心即道故曰道心因物有遷意動而昏始亂始
雜然其本心之正亦間見互出於日用云為之間三百

篇多此類天下是非二途而已矣是者是道非者非道
魯桓大惡春秋書其至于廟之合禮氓詩悔過孔子取
其反正之心聖人無私善無私怒平心是非皆以明道
不以是掩非不以非掩是檀木之美而堅者懷思念也
祭仲之言誠有利害然有可思念者

叔于田巷無居人豈無居人不如叔也洵美且仁叔于狩
巷無飲酒豈無飲酒不如叔也洵美且好叔適野巷無服
馬豈無服馬不如叔也洵美且武

狩補音始九切左氏天王狩于河陽穀梁作守班固答
賓戲孔終篇于西狩顏師古音守道之不明久矣自
孔門惟三月不違仁月至日至者知之雖有子路子夏
子張子游猶不知之而況於後世乎蓋道至易至簡至
近至平常故曰中庸庸常也人心即道故曰道心人心本
體自善自正自無所不通日用無非道者顧人自不省
自不信爾故夫日用庸平人皆不知其為道叔于田之
詩愛叔美叔人之善心也道心也無邪僻之思也孔子

取此取此道心也毛詩序乃皆曰刺莊公大夫本旨矣
大叔于田詩中曷嘗有不義之意惟不知是詩平正無
邪之即道心故外求其說以厥後叔段之惡掩前時京
人愛叔之善殊為害道豈無居人不如叔美且仁則雖
謂之無人可也言其不足道也無飲酒無服馬意同鄭
箋云洵信也疏引釋詁詢信也為證箋云服馬猶乘馬
也易曰服牛乘馬毛詩序曰叔于田刺莊公也叔處于
京繕甲治兵以出于田國人說而歸之

叔于田乘乘馬執轡如組兩驂如舞叔在藪火烈具舉禮
楊暴虎獻于公所將叔無狙戒其傷女叔于田乘乘黃兩
服上襄兩驂雁行叔在藪火烈具揚叔善射忌又良御忌抑
磬控忌抑縱送忌叔于田乘乘鵠兩服齊首兩驂如手叔
在藪火烈具阜叔馬慢忌叔發罕忌抑釋棚忌抑鬯弓忌
以有兩叔于田故于篇目加大字以別之釋文云或作
大叔于田者誤禮本文作袒忌並如字下同方補音姑
宏切公羊傳書黑弓左氏穀梁傳皆作黑肱儀禮侯道

五十弓方二寸以為侯中注云今文改寸為肱左氏傳
引古詩曰翹翹車乘招我以弓豈不欲往畏我友朋楚
辭九歌弓與懲叶枚乘七發弓與潯叶 乘馬四馬也
兩服兩驂共為四馬乘駕乘馬而田狩執持其轡如織
組織組者總紕於此成文於彼御者執轡於此而馬騁
於彼侶之兩服馬居轅間軛下無舒縱之狀惟兩驂居
轅外有舒縱之狀故曰如舞毛傳曰烈列具俱也鄭箋
云列人持火俱舉毛傳曰禮裼肉袒也暴虎空手以搏

之箋云獻于公所進之君也京人見叔檀楊暴虎曰請
叔無狃狎切戒其恐傷女也愛叔之言也毛傳曰乘馬
四馬皆黃驪白雜毛曰鵠爾雅郭注云今之烏驄兩服
毛色黑白而復有雜毛相錯者名鵠今謂之烏驄兩服
中央夾轅二馬褰亦有上義堯典褰陵言水上邱陵也
馬以高者為美以最良馬為兩服又兩首昂舉故曰上
褰兩驂在旁與兩服相次序微斜故曰鴈行忌者語助
之音以字寄音而釋文音記者方音不同爾今惟當隨

所書而讀之叔善射其御又良聲盡也或盡力控止其馬或縱馬而騁若送去然皆言善御之狀兩驂在左右如手阜盛也慢遲也罕希也馬慢天發希抑叔釋棚以覆天矣抑叔執鬯以弋弓矣弋吐刀切春秋左傳云公徒執冰而踞字與棚異音同冰攢丸蓋即箭筒其蓋可以取飲鬯弓謂弛弓而納之鬯中毛詩序曰大叔于田刺莊公也叔多才而好勇不義而得衆也此序之非釋見前叔于田

清人在彭駟介旁旁二矛重英河上乎翱翔清人在消駟
介庶庶二矛重喬河上乎逍遙清人在軸駟介陶陶左旋
右抽中軍作好

英補音於良切說文以央得聲出車詩釋文央央本作
英英同於良切荀卿賦篇世英與強叶離騷經落英與
何傷叶九歌英與央叶馮衍賦英與洋叶張衡賦流英
與朝陽叶古英雄之英英華之英皆為此讀 觀是詩
雖不知高克與文公事情之詳而其慢易不正可刺可

惡足以消人慢易之心起人敬正之心毛傳曰清邑也
彭衛之河上鄭之郊也消與軸皆河上地名也介甲也
矛有英飾鄭箋云清者高克所帥衆之邑也二矛酋矛夷
矛也考工記廬人酋矛常有四尺夷矛三尋鄭注云八
尺曰尋倍尋曰常此箋必曰異矛者以長短故得言重
英歟孔疏謂酋矛有二備折壞則惟可言雙英耳不可
言重喬高也車建二矛長短故重累而高歟箋云左左
人謂御者右車右也中軍謂將也高克之為將久不得

歸使其御者習旋車車右抽刃自居中央為軍之容好而已兵車之法將居鼓下故御者在左毛鄭皆曰容好則好上聲而陸德明呼報反非陶陶音搖則翔翔逍遙之意而陸徒報反亦未安詩中叶韻亦不若是太拘或平或側無定毛詩序曰清人刺文公高克好利而不顧其君文公惡而欲遠之不能使高克將兵而禦狄于境陳其師旅翱翔河上久而不召衆散而歸高克奔陳公子素惡高克進之不以禮文公退之不以道危國亡師

之本故作是詩也

羔裘如濡洵直且侯彼其之子舍命不渝羔裘豹飾孔武
有力彼其之子邦之司直羔裘晏兮三英粲兮彼其之子
邦之彥兮

侯補音洪姑切史記斬盧胡王漢書作侯左氏傳童
謡曰鵲鵲跼跼公在乾侯徵褰與襦易林師之井曰
苑子妙才戮辱傷膚然後相國封為應侯張衡西京
賦侯與拘叶揚雄解嘲侯與驅叶董仲舒敘傳侯與車

叶柳宗元弔裴弘辭侯與圖叶其如字又音記春秋左氏傳曰彼已之子邦之司直是詩乃親見在位之賢者愛之敬之故頌其善也而毛詩叙曰言古之君子以風其朝焉鄭自莊公以來固非有道之朝朝多小人而是詩乃親見非言古也次篇遵大路言君子去之安知非美此君子之賢也耶大夫羔裘如濡光澤之至也洵信也傳曰侯君也韓詩傳曰侯美也蓋公侯伯子男皆美稱侯必有訓不可得而知大槩美稱也亦猶易直子

諒子亦稱其善爾舍沈書者反棄舍也見危授命而不
變也渝變也毛詩傳曰豹飾緣以豹皮也孔甚也言甚
武有力出則執干戈而衛社稷也晏和柔也以羔羊之
皮為裘以柔為貴古者素絲以英裘此曰三英者所見
三縫也皮之大者左右袖一縫而已并中前縫為三縫
皮之小者左右袖各二縫并中前縫為五縫故羔羊詩
言五紕五緇五總皆謂縫中之英飾也彥士之美稱
遵大路兮摻執子之祛兮無我惡兮不寔故也遵大路

兮摻執子之手兮無我靚兮不寔好也

遵循也摻攬也祛袖也寔速也靚猶惡也好善也美也遵大路以追留君子攬執其祛無惡我我欲君子遲遲其行不速故也不速則善也愛之而欲其遲留也毛詩序曰莊公失道君子去之國人思望焉何止于思望而已直挽而遲留之也

女曰雞鳴士曰昧旦子興視夜明星有爛將翔將翔弋鳬與鴈弋言加之與子宜之宜言飲酒與子偕老琴瑟

在御莫不靜好知子之來之雜佩以贈之知子之順之
雜佩以問之知子之好之雜佩以報之

加補音一讀居之切三畧柔有所設剛有所施弱有
所用強有所加兼此四者而制其宜楚辭天問加與
虧叶揚雄長楊賦加與夷叶一讀居何切楚辭九懷
加與和叶七諫加與何叶張衡西京賦加與過叶魏明
帝祠詩加與柯叶 女曰雞鳴矣士曰昧爽矣女曰
子興視夜如何其及士興視則明星爛然以有星明

故憲牖微明侶昧旦夫婦相警言夙興也士又曰吾將
翺馬翔馬弋射鳬鴈言語助也加之中也史記曰以
弱弓微繳加諸鳬鴈之上宜之為言美而稱也夫婦
同其樂也宜飲酒以所加鳬鴈荐也與子偕老夫婦
相好故言及此有琴瑟馬惟其所御莫不靜好夫
婦和樂不淫於色故覺閑靜知子之所招來者其以
雜佩贈之乎知子之所順協者其以雜佩問之乎知
子之所愛好者其以雜佩報之乎夫婦同心好賢樂

善如此毛詩序曰陳古義以刺今不說德而好色也
鄭自莊公以來固無道鄭多淫風故謂此詩陳古然
詎可謂舉鄭國之人皆不說德而好色詩言翱翔弋
鳬鴈蓋賢者隱處野外之詩也詳觀詩辭殊非陳古
之情毛傳曰雜佩者珩璜琚瑀衝牙之類說文云珩
佩上玉也璜半璧也琚珮玉名也瑀玖石次玉也玉
藻云佩玉有衝牙鄭注云居中央以前後觸也玉府
鄭注引詩傳曰佩玉上有蔥珩下有雙璜衝牙蠙珠

以納其間玉藻云大夫佩水蒼玉世子佩瑜玉士佩
璫玫玉有女同車佩玉瓊琚邱中有麻貽我佩玖

有女同車顏如舜華將翔將翔佩玉瓊琚彼美孟姜洵
美且都有女同車顏如舜英將翔將翔佩玉將將彼美
孟姜德音不忘

是詩深言孟姜之善而亦不言同車者之不善婉而
彰愛而忠追考時事則太子忽嘗有功于齊齊侯請
妻之忽曰齊大非吾耦也遂辭之國人惜其失大國

之助故作是詩而毛詩序謂國人刺之則過矣又謂
見逐而後刺之益非此詩之情熟觀此詩則知之又
曰忽以國人而名君大逆也又累篇言刺忽嗚呼痛
哉惟孔子作春秋奉天道而筆削且孔子非鄭臣故
可書鄭忽今此序曰鄭人刺忽則悖亂天常不可以
訓毛傳曰親迎同車也舜木槿也子忽辭齊而他娶
雖美然彼孟姜尤美且有賢德之音惜其失大國之
助隱然在中都猶好也見書禹謨臯陶謨

山有扶蘇隰有荷華不見子都乃見狂且山有橋松隰有游龍不見子充乃見狡童

山宜有扶蘇隰宜有荷華國宜有賢俊今不見賢俊乃見不肖子都喻賢俊狂且喻不肖毛詩序曰刺忽也所美非美然詩人方舍隱不敢指切其君而序曰刺忽大悖也毛傳曰扶蘇扶胥小木也爾雅釋草云荷芙蕖紅龍古其大者歸郭注云俗呼紅草為龍鼓語轉耳陸璣云一名馬蓼葉大而赤白色生水澤中

高文餘爾雅疏引此詩遊龍為證張橫渠曰遊龍紅
草也其枝樛曲著土處生根如龍也釋文云橋本亦
作喬董云子都世之美好者也子充不見于書疑亦
以美著也毛傳謂狡童昭公也斷斷乎無此義狡童
猶狂且狂狡謂在朝之小人若以喻君則悖逆甚矣
擇兮擇兮風其吹女叔兮伯兮倡予和女擇兮擇兮風
其漂女叔兮伯兮倡予要女

按此篇永樂大典缺卷樓鑰集載其解云此詩凡
言女皆指君也女者愛之之辭鑰論云民勞王欲

王女是用大諫此意尤明又卷阿俾爾彌爾性之類不惟是愛君如古稱我為朕未至如秦以來分

別之

嚴也

彼狡童兮不與我言兮維子之故使我不能餐兮彼狡童兮不與我食兮維子之故使我不能息兮

餐補音遂緣切

按原本以上三字脫今補

古詩周公下白屋吐哺

不及餐一沐三握髮後世稱聖賢摯虞思遊賦餐與

乾叶韓愈秋懷詩餐與前叶 諸儒咸謂狡童指昭

公無乃大不道乎詈其君矣雖河南程氏猶同之蓋

根本于毛傳與序之失遂不復思而從其悖也此狡
童謂狂臣擅命之小人也故不親君子不與君子言
不與君子食謂疏遠之不與廩祿也子謂鄭君也君
子不忘君憂其禍即至故不能餐不能安息也毛詩
序曰刺忽也不能與賢人圖事權臣擅命也然則強
臣擅權則不與賢者祿食者權臣非昭公也沒君子
愛君之善誣君子以詈君之大罪奚可奚可公子翬
謂隱公曰百姓安子諸侯說子山有樞子之衣裳宛

邱子之湯兮子皆指君

子惠思我褰裳涉溱子不我思豈無他人狂童之狂也
且子惠思我褰裳涉洧子不我思豈無他士狂童之狂
也且

子謂鄭君也鄭君遠賢而近小人賢者退處而心不
忘君故作褰裳之詩曰子惠思我我則褰裳涉溱而
來子不我思豈無他人言君固自有他人為之任用
此語深譏焉而婉者也卒直言曰狂童之狂也且疾

所任用乃狂妄小人爾諸儒未觀詩而先觀毛詩序
與傳反以序傳病詩曲推強釋良可笑不思序傳之
繆誤甚著甚多是序曰褰裳思見正也狂童恣行國
人思大國正已也詩中安有此情腐儒苦思或至迂
僻亦猶左氏曰豫凶事歟

子之丰兮俟我乎巷兮悔予不送兮子之昌兮俟我乎
堂兮悔予不將兮衣錦裝衣裳錦裝衣裳叔兮伯兮駕予
與行裳錦裝裳衣錦裝衣叔兮伯兮駕予與歸

卷補音胡貢切離騷經啓九辨與九歌兮夏康虞以
自縱不顧難以圖後兮五子用失乎家卷 毛詩序
曰昏姻之道缺陽倡而陰不和男行而女不隨觀詩
意誠有之然今悔矣悔過之心聖人取焉而序總曰
刺亂也則差矣此悔而作詩求復諧者也丰豐滿也
巷門外也男親迎而女不從男不得已而退猶俟於
門外也猶覲女之或從也今女悔縱未從而姑送之
猶未至於深絕也昌盛也將猶送也先言巷後言堂

更韻也鄭箋云裝禪蓋以禪縠為之中衣裳用錦而
上加禪縠焉中庸曰衣錦尚縠惡其文之著也古者
衣裳中錦外絅風俗率如此故雖衰世猶未變絅裝
音義同女悔而告長上叔伯曰今車駕而迎予則與
之行矣衣裳錦裝言衣裳已具飭今車駕而迎予則
與之歸矣婦人謂嫁曰歸

東門之墀茹蘆在阪其室則邇其人甚遠東門之栗有
踐家室豈不爾思予不我即

東門之平墀又有茹蘆之草在其阪阪又有栗木焉
踐行也行道之旁有家室焉其家室中之人女之所
慕者而其不我即故有甚遠之嘆是詩女則淫矣而
士則正毛詩序槩曰刺亂其半差矣毛傳曰東門城
東門也墀除地町町者茹蘆茅蒐也爾雅釋草云茹
蘆茅蒐郭注云今之菑也可以染絳坂大坡不平

風雨淒淒雞鳴喈喈既見君子云胡不夷風雨蕭蕭雞
鳴膠膠既見君子云胡不瘳風雨如晦雞鳴不已既見

君子云胡不喜

是詩美君子不改其度也鄭有君子雖居亂世不從世俗所移國人喜之也而毛詩序曰思君子也詩曰既見非思胡何也夷平也亂世賢者多憂既見君子喜而失其憂故夷平也

青青子衿悠悠我心縱我不往子寧不嗣音青青子佩悠悠我思縱我不往子寧不來挑兮達兮在城闕兮一日不見如三月兮

因久不見之學子乃挑達于城闕之間於是追恨曰
我一日不見如三月之久思如此之切而彼乃若是
耶毛詩序曰刺學校廢也亂世則學校不修焉毛傳
青衿青領也學子之所服鄭箋云學子而俱在學校
之中已留彼去故隨而思之爾禮父母在衣純以青
嗣續也女曾不傳聲問我責其忘已爾雅釋器云衣
皆謂之襟郭注云交領方言云衿謂之交釋器又云
衿謂之裋郭注云衣小帶疏引士昏禮施衿結帨為

證此衿非襟毛傳謂領者取方言之交取爾雅之襟然襟非領乃袂也古謂之衽亦謂之襟衣所以交於前者以有衽也衣身前不交續以左右二衽而後交方言襟謂之交謂此也領亦因是而交而襟非領毛傳郭注皆誤衿有二義一曰襟一曰帶然襟狹侶帶故因名歟毛傳曰佩佩玉也士璫珉而青組綬程曰挑輕躍達放恣鄭箋云廢學業但好登高見於城闕闕者謂於城之闕處置門其兩旁城土高而稍濶可

以登而望遠

揚之水不流東楚終鮮兄弟維予與女無信人之言人
實迂女揚之水不流東薪終鮮兄弟維予二人無信人
之言人實不信

激揚之水不能流一束之楚微弱令不行也雖有兄
弟心則相殘亦可言鮮兄弟爭國羣臣公族咸有二
心維予與女二人而已無信人之言人實誑女迂誑
也納忠至矣此忠愛其君之詩也毛詩序謂忽已死

亡而作是詩詩辭非死亡後之辭也

出其東門有女如雲雖則如雲匪我思存縞衣綦巾聊
樂我員出其闔閭有女如荼雖則如荼匪我思且縞衣
茹蘆聊可與娛

出其東門有女如雲之盛雖則如雲之盛而我心不
在焉我自員姓者吾妻也春秋有鄆國亦作邳漢

中有鄆闕

按樓鑰云此說未然毛鄭不解員字疏言樂我之心耳云員古今字助句辭也唐員

半千齊州人其先本彭城劉氏十世祖凝之事宋為起部郎及齊受禪奔元魏以忠烈自比伍員因改姓

員古無此姓也況此詩解內云陸德明以爾雅云徂
徂也牽合上章思存改且作徂甚無謂也且語助也
於義自通何必牽強又改
字以此知員亦語助耳 縞衣綦巾我自樂之如茶

亦言其盛多吾妻縞衣如蘆為飾雖方麗不如東門
之女而亦聊可與娛鄭多淫新棄舊有夫婦相與不
替不以外色動心聖人之所取也而毛詩序曰閔亂
也公子五爭兵革不息男女相棄民人思保其室家
焉詩中殊無此情顧命綦弁鄭云綦赤黑色是詩毛
傳曰綦蒼艾色闔曲城也闔城基爾雅釋宮云闔謂

之臺茹蘆藉草染色為飾鄭箋云閣讀當如彼都人
士之都陸德明以爾雅云徂存也牽合上章思存故
改且作徂甚無謂也陸好異多有此病且語助也於
義自通何必牽強又改字况舊音子徐反今從舊音
野有蔓草零露漙漙有美一人清揚婉兮邂逅相遇適
我願兮野有蔓草零露漙漙有美一人婉如清揚邂逅
相遇與子偕臧

漙本亦作團顏師古糾繆正俗云鄭詩零露漙漙今古

本有水傍作專亦有單字者後人輒為團字呂氏字
林雨下作專訓云露貌音上充切 孔子遭程子於
塗傾蓋而語終日甚相親傾謂子路取束帛以贈先
生子路違命有間顧謂子路子路如初孔子曰詩不
云乎有美一人清揚婉兮邂逅相遇適我願兮今程
子天下賢士也於斯不贈則終身不能見也小子行
之毛詩序乃曰男女思不期而會審如序言則孔子
豈敢以謂程子斷斷乎無是理蔓生之草露零其上

零落也溥者露貌蓋當時所見相遇之樂視景物皆
樂故即所見以發詩詠之端凡詩言美人皆稱其賢
方言云目驢腫之子曰盱或謂之揚其以腫子多揚
動故名歟心相契合也鄭雖亂先王之澤猶未泯在
野豈無賢者

溱與洧方渙渙兮士與女方秉蘭兮女曰觀乎士曰既
且且往觀乎洧之外洵訏且樂維士與女伊其相詆贈
之以勺樂溱與洧瀏其清矣士與女殷其盈矣女曰觀

乎士曰既且且往觀乎洧之外洵訏且樂維士與女伊其將詭贈之以勺藥

毛詩序曰溱洧刺亂也毛傳云溱洧兩水名蘭蘭也訏大也衆殷也鄭箋云既已也洵信也將大也易曰風行水上渙水則渙散女曰往觀乎士曰既觀矣且語助語之止辭女又曰如此則往觀乎洧之外往觀不載女曰者意明省文也謂洧外信甚寬大甚可樂也士與女於是乎相詭其終贈之以勺藥伊猶彼也

相詭毛無傳鄭箋謂行夫婦之事殆未必然然士與女相戲詭如此已大亂矣故詩人刺之毛傳謂勺藥香草陸璣云今藥草勺藥無香氣毛傳亦多誤豈未見勺藥而意之耶今藥草勺藥其華甚美殆即此爾而無香氣將詭謂戲詭之甚也語淫穢也或疑是詩不正遂曲為之說不思士曰女曰詩人之辭也叙其事所以著其惡也刺之也非士女相詭者自作是詩也

欽定四庫全書

經部

慈湖詩傳卷八

詳校官監察御史臣邱庭澍

通政使司副使臣莫瞻菴覆勘

謄錄監生臣潘原濟

欽定四庫全書

慈湖詩傳卷七

宋 楊簡 撰

齊

雞既鳴矣朝既盈矣匪雞則鳴蒼蠅之聲東方明矣朝
既昌矣匪東方則明月出之光蟲飛薨薨甘與子同夢
會且歸矣無庶予子憎

補音明謨郎切荀卿書昭昭乎其智之明與詳叶為
天下明與忘叶契元王生昭明與商叶又引古詩如

雪霜之將將日月之光明楚辭夜皎兮既明與桑叶
步列星而極明與方叶秦東觀刻石原道至明與陽
叶會稽刻石追首高明與莊叶漢房中歌承帝之明
與彊叶唐虞之元首明哉與股肱良哉庶事康哉為
韻周易其辨明也與長叶不足與有明也與剛叶徐
邈楚辭釋音明音亡白虎通清明風者清芒也正月
詩視天夢夢沈重讀揚雄甘泉賦夢與繩叶太元遇
首幽遇神及師夢 雞既鳴矣朝既盈矣乃曰匪雞

則鳴乃蒼蠅之聲爾妄言以却雞鳴之告蒼蠅有聲
則晏有甚於雞鳴時矣荒淫妄言以却告者東方明
矣士大夫之詣朝者已昌盛矣乃曰匪東方明乃月
出之光爾荒淫之狀益著蟲飛薨薨日出矣猶曰甘
與子同夢是詩兩言子皆謂婦人君子偕老子之不
淑子之清揚皆謂夫人也又曰彼來朝之士大夫行
且歸矣會者相將之意歸則無久伺之勞庶不憎惡
予與子也前言朝既盈朝既昌則士大夫來朝既久

其意已明故此言會且歸者其指來朝之士大夫明
矣荒淫至於此極毛詩序歸之哀公容或有之但曰
思賢妃也故陳賢妃貞女夙夜警戒相成之道則差
矣諸儒不知序之不足盡信率以序解詩其有阻礙
必至於委曲穿鑿牽合

子之還兮遭我乎狃之間兮並驅從兩肩兮揖我謂我
儼兮子之茂兮遭我乎狃之道兮並驅從兩牡兮揖我
謂我好兮子之昌兮遭我乎狃之陽兮並驅從兩狼兮

揖我謂我臧兮

還音旋閒補音居賢切漢書李廣傳自以大黄射其
裨將服虔曰黃有弩也晉灼曰黃肩即黃間也司馬
相如上林賦赤瑕駁犂雜重其間鼉采琬琰和氏出
焉班固西都賦裒以藻綉絡以綸連隨侯明月錯落
其間張衡南都賦間與顛叶曹植瑟瑟歌間與阡叶
韓愈孟東野失子詩間與賢叶簡觀今京語間之餘
音亦有肩音儼許全反毛詩傳謂還便捷之貌未

安還回旋也忽遭我於狃山之間於是子與我並驅
從逐兩肩其初相遭未揖及並驅從肩乃揖我謂我
儼兮儼駿捷之稱也茂昌皆謂盛也言氣貌之盛美
之之辭也好美也臧善也猶好也毛傳曰獸三歲曰
肩爾雅釋獸云狼牡獾牝狼舍人曰狼牡名獾牝名
狼毛詩序曰還刺荒也哀公好田獵從禽獸而無厭
國人化之遂成風俗習於田獵謂之賢閑於馳逐謂
之好焉漢地理志引此齊詩曰子之營兮遭我虓嶮

之間兮顏師古注云齊國風營詩之辭也毛詩作還
韓詩作營之往也嶢山名也字或作猓亦作嶢音皆
乃高反言往適營邱而相逢于嶢山也董氏曰考于
地記嶢猓嶢皆山名在齊之郊故諸書或異崔靈恩
集注還茂昌三者皆地名也然平觀文勢則毛詩謂
還茂昌為貌是也孔疏曰士大夫聚說田事以為戲
樂而荒廢政事故刺之

俟我於著乎而充耳以素乎而尚之以瓊華乎而俟我

於庭乎而充耳以青乎而尚之以瓊瑩乎而俟我於堂乎而充耳以黃乎而尚之以瓊英乎而

漢地理志言齊地風俗引齊詩曰俟我於著乎而此亦舒緩之體也藝文志謂齊詩咸非其本義魯最為近之然則班固謂為舒緩之體者魯詩之說也去二家而取魯其考之亦詳矣今毛詩止一家之說況多謬誤奚可盡從又況毛傳猶未明言刺不親迎至衛宏作毛詩序始明言刺時不親迎亦不言何世則臆

說也考本詩三章三言俟我殊非陳古之情衛宏蓋
意雞鳴還東方之日皆荒淫之詩而是詩次於其間
當亦非美故曲推其說夫詩之不可以次言也明矣
清人鄭文公之詩而次昭公之詩之上況齊俗近於
魯孔子曰齊一變至於魯則齊之禮儀亦美矣雖當
衰亂風俗豈盡變而為惡無一事一為之善乎況是
詩亦特美其禮儀而已三百篇蓋多平正無他雖無
深旨而聖人取焉正以庸常平夷之即道也諸儒不

知道故穿鑿而無說其害道甚矣俟待也爾雅釋宮
云門屏之間謂之宁而毛傳曰門屏之間曰著孔疏
謂著與宁音義同鄭康成謂以素充耳所以懸瑱者
或名為紃亦有理但謂人君五色臣三色織之未必
然初無典據惟以此詩曲推其說且以素為先見鑿
甚矣士冠禮元端元裳黃裳雜裳可也而康成妄析
其義曰上士元裳中士黃裳下士雜裳於以驗康成
不善屬文不達文理是詩充耳以素以青以黃安知

非元裳黃裳雜裳之謂乎皆可也康成云瓊華者謂
懸紉之末所謂瑱也考工記玉人云天子用金則公
侯以下皆玉石雜說文曰瓊赤玉也玉石之雜而赤
者爾瓊華其色之盛者歟瓊瑩其色之瑩者歟瓊英
其精英歟尚者著之於紉端歟是詩禮儀其親迎歟
鄭風言俟我乎堂亦謂親迎也

東方之日兮彼姝者子在我室兮在我室兮履我即兮
東方之月兮彼姝者子在我闥兮在我闥兮履我發兮

東方之日兮日始出之時也彼姝美之女子忽在我
之室兮再言在我室兮者駭之而情深也履者以足
躡我猶陳平躡漢王其意即通無俟乎言也履我使
即之為淫也即就也此肆焉無所忌者也東方之月
兮月始出之時也彼姝者子忽在我之闥兮闥門也
履我使發足而與之俱往也既入夜又不入我室此
則或有所忌者此與桑中溱洧同作詩以刺淫奔也
或在朝或在夜或在室或在闥刺彼故其事不一也

然履我即兮未必果即之也履我發兮未必果發也
毛詩序曰東方之日刺哀也君臣失道男女淫奔不
能以禮化也夫不刺淫奔而刺國之哀是長淫奔者
之惡也本詩惟刺淫奔而序旁推其說衛宏不知道
其作序率類此

東方未明顛倒衣裳顛之倒之自公召之東方未晞顛
倒裳衣倒之顛之自公令之折柳樊圃狂夫瞿瞿不能
辰夜不夙則莫

顛補音典因切司馬相如上林賦長嘯哀鳴翩翻互
經天矯枝格偃蹇杪顛漢童謡黃雀巢其顛與人叶
易林賁之豐曰採薪得麟大命隕顛噬嗑之未濟顛
與民叶揚雄元后誅顛與盈叶倒都老反 觀是詩
知公未明而召羣臣臣急趨之故顛倒衣裳日未出
而東方先明晞者又其微明未晞則益早矣公如此
勤於政者然失時失節乃輕躁狂妄如折抑樊圃焉
抑質柔細而以為圃之藩籬何益於事無足為禁也

又如狂夫瞿瞿然瞿瞿驚視之狀狂者驚視急於為
又何益於事哉晨夜謂早夜也不能晨夜言全不識
早夜若非太早而夙則太遲而莫矣大抵狂躁輕妄
之人忽急忽緩忽早忽夜皆不可測毛詩序曰東方
未明刺無節也朝廷興居無節號令不時挈壺氏不
能掌其職焉公號令失時則夜未終必令報夜終遂
使挈壺氏失職刻漏錯亂

南山崔崔雄狐綏綏魯道有蕩齊子由歸既曰歸止曷

又懷止葛屨五兩冠綈雙止魯道有蕩齊子庸止既曰
庸止曷又從止蓺麻如之何衡從其畝取妻如之何必
告父母既曰告止曷又鞠止析薪如之何匪斧不克取
妻如之何匪媒不得既曰得止曷又極止

補音雙疎工切

按原本三字脫

孔臧格虎賦耳目喪精值網

而衡局然自縛或隻或雙史記龜策傳禍與福因刑
與德雙揚雄河東賦雙與東叶後漢語殿中無雙丁
孝公五經無雙許叔重天下無雙江夏黃童荀氏八

龍慈明無雙任文公智無雙縷如誰反從音縱畝一
讀滿罪切古作晦說文以每得聲宋玉高唐賦畝與
止叶楚辭畝與芷叶張衡東京賦畝與已叶一讀滿
補切易林歸妹之坤畝與暑叶班固西都賦畝與矩
叶韓愈元和聖德詩畝與祖叶柳宗元招海賈文畝與
覩舜叶 詳觀南山之詩其刺襄公鳥獸之行亦著
矣南山崔崔有人君尊嚴之象言雄知其對雌狐之
為獸多疑周易凡言狐皆取疑象襄公為鳥獸行與

文姜淫慾已縱而不能止心愧沮而若疑又齊襄雖
由魯道而歸身則在塗心則在魯愧慾雜錯發諸精神見
諸步武有遲疑綏綏之狀故曰綏綏衛風有狐亦有
疑貳之意有蕩者因道路平蕩以寓譏魯蕩然無制
之意首章不言齊襄往而唯言襄公歸者明初往襄
公之惡未成未明及歸則成矣明矣故止言其歸詩
人於是致其譏曰既曰歸齊矣曷又懷之也謂其又
懷文姜也葛屨至賤之物也五兩當是文姜與其姪

娣或從者共五人也冠綏居首之物所尊所貴者也
今也與葛屨雙止非類而並處以尊而混卑則鳥獸
之行又著矣據此則所亂又不止於文姜矣庸常也
齊侯既常在魯道路之中為淫矣曷又極其縱放也
從即縱字縱放之狀不可得而知據此可以想而知
矣非謂常在魯道為可也言其縱之甚也首章曷又
懷止其意同蓺種也蓺麻如之何衡從其畝以喻取
妻如之何必告父母衡橫縱直無別義既曰告止謂

文姜初嫁既告於廟矣曷又鞠止窮之不已也鞠之
為言言鳥獸行而微其辭者也匪媒不得亦兼明淫
亂之匪媒既曰得止曷又極止言魯桓既得文姜矣
齊侯曷又極之不已也極猶鞠也毛傳謂齊子謂文
姜既於是詩文旨難通而載驅齊子發夕齊子豈弟
尤難通齊人之詩言齊子發夕謂襄公則明苟謂文
姜則文姜自魯發夕齊人何由知之謂男子豈弟則
宜謂婦人則難至於敝笱所言齊子則謂魯桓不能

制文姜齊侯來淫而歸惟言歸者亦結證其惡齊人
不敢預料其君於惡也詩稱君曰子固多齊君至是
其體益輕故曰子亦為之隱也毛詩序曰南山刺襄
公也鳥獸之行淫乎其妹大夫遇是惡作詩而去之
無田甫田維莠騷騷無思遠人勞心忉忉無田甫田維
莠稂稂無思遠人勞心怛怛婉兮孌兮總角卅兮未幾
見兮突而弁兮

爾雅釋詁云甫大也孔疏曰人治田無得田此大田

若大田過度力不充給田必蕪穢維有莠草驕驕然無
思遠人徒勞心忉忉爾遠人諸侯也遠人不難致此
有德則彼至矣曰無思遠人則其君之無德徒勞可
見矣如田大田徒勞無獲驕縱也桀桀出也維莠驕
縱桀出則良苗不興不實矣婉孌言少年貌美毛傳
謂總角聚兩髦也孔疏謂兩角𠂔然未及幾次見之
而突然已冠弁矣此末章雖平言無譏而其含護不
敢言而卒已之意可見毛詩序曰甫田大夫刺襄公

也無禮義而求大功不修德而求諸侯志大心勞所以求者非其道也

盧令令其人美且仁
盧重環其人美且鬢
盧重鋤其人美且偲

環補音胡消切

按原本五字脫

馬融廣成頌環與園叶曹植

美女篇環與翩翩叶何晏景福殿賦環與源叶顏延年北湖應詔詩環與天叶鬢音權董曰韓詩作盧冷冷說文引詩作獮毛詩序曰盧令刺荒也襄公好

田獵畢弋而不修民事百姓苦之故陳古以風焉毛
傳曰盧田犬令令纓環聲言人君能有美德盡其仁
愛百姓欣而奉之愛而樂之順時遊田與百姓共其
樂同其獲故百姓聞而說之其聲令令然攷序及傳
皆謂陳古而本詩辭情不然曰其人其辭指今非陳
古也苟陳古則宜每章稱仁稱德而次章曰鬻耒耜
曰偲又三章皆曰美殊非陳古之意蓋序傳以襄公
之詩不應有美故曲推其說以為陳古以風不知詩

不可以次序觀不可以執一觀以鄭叔段之惡而兩
叔于田之詩京人未嘗不說之以鄭清人文公之詩
而次於莊公詩中盧令未必果襄公之詩果襄公之
詩則叔于田之類也襄公雖無道而不聞其暴民故
田而民悅之歟民悅其君正也道也不然則齊有士
大夫之賢者民悅其田也亦正也道也百姓日用此
道而不知故不明已之道心又不知人之道心而況
於六經之大旨乎毛傳曰重環子母環也鉤一環貫

二也鬢好貌偲才也釋鬢曰好未安鬢其須之卷曲歟

敝筍在梁其魚魴鰥齊子歸止其從如雲敝筍在梁其魚魴鰥齊子歸止其從如雨敝筍在梁其魚唯唯齊子歸止其從如水

鰥補音姑倫切楚辭天問舜閔在家

按原本脫舜閔二字

又何以

鰥堯不姚告二女何親毛詩序曰敝筍刺文姜也齊人惡魯桓公微弱不能防閑文姜使致淫亂為二

國患焉此非魯桓時詩也何以明之魯桓公娶齊僖公之女文姜魯桓十四年齊僖卒十五年魯桓雖嘗與齊襄會盟而文姜不行至十八年魯桓始與文姜如齊申繻諫焉齊襄於是通文姜魯桓謫文姜姜以告夏四月齊人殺魯桓夫齊人未殺魯桓之前齊襄與文姜為淫之迹未至於若是詩所述肆行而無忌也是詩其魯莊二年姜氏會齊襄於禚四年姜氏享齊襄于祝邱已後之詩歟是詩齊人譏襄公并譏魯

莊微弱及文姜也笱者捕魚之器敝敗之笱在於魚
梁鰥大魚魴亦中魚喻魯莊微弱不能以禮防閑其
母止齊襄之來致齊襄疾驅於通道大都與文姜淫
不已也惟言齊襄之歸不言齊襄之往者齊人不敢
預臆其君於惡及成惡而歸始形於言其意與南山
同亦含隱矣魴雖非甚大之魚因鰥連文意在鰥也
鰥魚之大見孔叢子衛人得鰥魚其大盈車魴亦非
甚小之魚欲易韻又鰥至不美之魚語曰網魚得魴

不如啗茹亦喻齊襄與文姜之惡也其從者如雲言其盛如雨言其多如水言其疾驅也既見魯之無制又見齊襄之肆惡無忌也釋魚云魴魴郭璞云江東呼魴魚為鰕一名魴邢疏云陸璣云魴今伊洛濟潁魴魚也廣而薄肥恬而少力細鱗遼東梁水魴特肥而厚尤美於中國魴其鄉語曰居就糧梁水魴

載驅薄薄簞茀朱轡魯道有蕩齊子發夕四驪濟濟垂轡漚漚魯道有蕩齊子豈弟汶水湯湯行人彭彭魯道

有蕩齊子翱翔汶水滔滔行人儻儻魯道有蕩齊子遊
教

夕補音祥龠切淮南子施之無窮而無所朝夕舒之
彌於六合卷之不盈一握李興諸葛亮表閭之文仁
智所處能無規廓日居月諸時隕其夕郭璞江賦域
之以盤巖豁之以洞壑疏之以沱汜鼓之以朝夕陶
潛自祭文故人淒其相悲同祖行於今夕羞以嘉疏
薦以清酌陸雲夏府君誄瞻彼日月歲聿云夕寒暑

窮化四辰交錯 薄薄車行之聲也爾雅釋器云輿
革前謂之輶後謂之茀竹前謂之禦後謂之蔽郭注
云茀以韋鞮後戶禦以簾衣軾蔽以簾衣後戶毛傳
曰簾方文席也車之蔽曰茀諸侯之路車有朱革之
質而羽飾魯道平蕩亦寓蕩然無制之譏齊君夕而
發車趨魯道焉夕而發者亦有愧于中不敢朝發與
孫炎曰驪黑也爾雅釋畜云駉北驪牡是詩孔疏云
駉馬皆鐵驪之色垂轡徐行之狀也豈茀樂易從容

之貌雖刺譏其辭婉矣其辭雖婉其譏實深彭彭盛
貌儻儻衆貌翱翔遊遨垂轡皆從容候待文姜及濡
留不肯旋反之狀毛詩序曰載驅齊人刺襄公也疾
驅於通道大都與文姜淫播其惡於萬民焉

猗嗟昌兮碩而長兮抑若揚兮美目揚兮巧趨蹌兮射
則臧兮猗嗟名兮美目清兮儀既成兮終日射侯不出
正兮展我甥兮猗嗟變兮清揚婉兮舞則選兮射則貫
兮四矢反兮以禦亂兮

毛詩序曰猗嗟刺魯莊公也齊人傷魯莊公有威儀
技藝然而不能以禮防閑其母失子之道人以為齊
侯之子焉猗嗟嘆辭此嘆辭有美有傷昌容色之盛
也孔子言文王之狀頎然而長抑繼辭也上言昌言
長此又言揚故曰抑詩人言貌多言揚曰子之清揚
曰清揚婉兮方言云目黪矐之子盱或謂之揚蓋目
之精神全在黪矐言人之美多在精神故多言揚此
言若何之揚兮真美目之揚也趨蹌之巧趨步之有

儀也禮曰士蹌蹌射則甚善也臧善也朱曰名猶稱也言其威儀技藝之可名也朱意謂人稱譽其威儀技藝之美有名譽也美目清明也儀既成兮言威儀習熟成就也侯即今之垛正即帖即鵠梓人為侯廣與崇方參分其廣而鵠居一焉射人之職王五正諸侯三正孤卿大夫二正士亦二正毛詩傳曰二尺曰正外孫曰甥鄭箋云姊妹之子曰甥蓋據爾雅釋親而云魯莊公乃齊襄公時當曰姊妹之子爾雅曰展

誠也嬖好貌言目之美也非勁者也選者鄭謂於倫等最
上也貫者矢正中鵠貫而穿之也四矢乘矢也射禮
必乘矢者鄭箋云象其能禦四方之亂反者射終而
反其矢也射所以禦亂今魯莊射不出正而不能禦
閨門之亂譏而婉其辭也毛詩序謂人以為齊侯之
子焉贅矣失孔子之旨

魏

糾糾葛屨可以履霜摻摻女手可以縫裳要之褌之好

人服之好人提提宛然左辟佩其象掃維是褊心是以
為刺

補音服鼻墨切

按原本三字脫

易林困之中孚曰絲紵布帛

人所衣服摻摻女手紡績繕織士冠禮云令月吉日

始加元服棄爾幼志順爾成德秦泰山刻石皇帝臨

位作制明法臣下修飾廿有六年初并天下罔不賓

服三句一韻

按士冠禮以下從韻補補入

毛傳曰夏葛屨冬皮

屨葛屨非所以履霜鄭箋云葛屨賤皮屨貴魏俗至

冬猶謂葛屨可以履霜利其賤也毛傳曰摻摻猶織
織也婦人三月廟見然後執婦功按士昏禮舅姑歿
乃有廟見之禮舅姑存則婦人三月然後祭行謂助
祭也鄭箋云言女手者未三月未成為婦裳男子之
下服賤又未可使縫魏俗使未三月婦縫裳者利其
事也毛傳曰要褱也褱領也好人即摻摻女手之人
美好也要之縫褱也褱之縫領也使好人服其勞爾
雅云提提安也凡辟當左左為卑右為尊宛婉婉柔

順之容也以象骨搔首名曰掃毛詩序曰葛屨刺褊也魏地陜隘其民機巧趨利其君儉嗇褊急而無德以將之夫本詩刺魏俗也刺魏俗之褊心也而序必推及其君以園有桃觀之其君誠褊嗇陋甚而葛屨之詩辭情不及其君衛宏不知道率為贅辭徒惑後學

彼汾沮洳言采其莫彼其之子美無度美無度殊異乎公路彼汾一方言采其桑彼其之子美如英美如英殊

異乎公行彼汾一曲言采其蕢彼其之子美如玉美如玉殊異乎公族

王肅孫毓皆以為大夫采菜鄭康成亦如之箋云其采莫之事則非公路之禮也毛傳曰路車也公行從公之行也公族公屬不釋殊異之義以其言大夫文義甚明無俟於釋乎集註序曰其君子儉以能勤釋文亦以此本為正惟他本毛詩序則曰其君儉以能勤苟以為君采則何為不以他官為此而獨以公路

公行公族為比乎毛傳曰汾水也沮如其漸洳者莫
菜也蕒水蔦孔疏云沮如潤濕之處陸璣疏云莫莖
大如箸赤節節一葉似柳葉厚而長有毛刺今人繼
以取繭緒其味酢而滑始生可以為羹又可以生食
五方通謂之酸迷冀州人謂之乾絳河汾之間謂之
莫言語助也鄭謂無度不可尺寸言美之至也美則
無度矣但殊異乎公路凡為公路者不如是也豈有
掌路車之官而采莫菜於汾水之沮洳乎是詩惟譏

公路公行公族而不及他官者大抵上無禮教則公族多不學文近君習君之儉陋寢至於采茹采桑不知其不可也英如舜英之英美如華也孔疏謂公路與下公行一也引春秋左傳宣二年晉事為證亦不甚明以後晉證古魏豈能盡同況毛傳三釋甚明鄭箋謂公路主君之輶車庶子為之晉趙盾為輶車之族是也其箋未必當服虔云輶車戎車之倖是詩公路正掌公之路車非掌從公之行也爾雅蕢牛脣郭

注引詩傳曰水蔦也如續斷寸寸有節陸璣以為今澤蔦郭氏所不取鄭箋云公族主君同姓毛詩序曰汾沮洳刺儉也其君儉以能勤刺不得禮也韓詩三章皆作彼已之子其已音近韓毛記音不同已音近釋見崧高

園有桃其實之殽心之憂矣我歌且謠不知我者謂我士也驕彼人是哉子曰何其心之憂矣其誰知之其誰知之蓋亦勿思園有棘其實之食心之憂矣聊以行國

不知我者謂我士也罔極彼人是哉子曰何其心之憂
矣其誰知之其誰知之蓋亦勿思

殽者肉之有骨者也今儉而以桃實為殽過於儉矣
儉美德也而過焉至於此甚知不得其道也知失其
條理而至是也得其條理者雖不過儉而財用自豐
失其條理者雖殽桃食棘而財用益匱孟子曰無政
事則財用不足故殽桃食棘國人以為善而智者以
為憂憂其無政事而未流至於危亂也憂鬱而發於

歌謠歌音長謠音短不知我者謂我士君子也而驕
謂我不樂君之至儉為驕也彼人是哉謂君所為是
也子姑言之其說為何也其音如字其義自通他書
作何居者亦當音如字其義亦通其與居蓋記音不
同陸德明音基未安詩人於是曰我心憂矣其誰知
之重言知之者誠寡也女蓋亦不思爾知此理者自
古以來罕其人也汾沮洳之是非人猶易知園有桃
之是非雖本自昭然而士大夫之有知者寡矣行於

國中亦以舒憂罔極謂責人無已也謂論治無有窮已無有畔岸也彼無智者觀智者率如是毛傳曰棘棗也廣韻曰小棗今所在有之小而圓毛詩序曰園有桃李時也大夫憂其君國小而迫而儉以嗇不能用其民而無德教日以侵削故作是詩也衛宏此序奚足以知此詩使宏居魏朝亦安能有所為哉亦拱手以受侵削而已矣其言妄繆惟可發笑魏君儉陋若是奚止不能用其民而已哉凡政事皆失矣忽云

德教費不知類此序既不足以發明詩情徒為謬贅
而諸儒率宗之何也

陟彼岵兮瞻望父兮父曰嗟予子行役夙夜無已上慎
旃哉猶來無止陟彼岵兮瞻望母兮母曰嗟予季行役
夙夜無寐上慎旃哉猶來無棄陟彼岡兮瞻望兄兮兄
曰嗟予弟行役夙夜必偕上慎旃哉猶來無死

母補音滿罪切易林泰之否曰陟岵望母役事未已
淮南子以天為父以地為母陰陽為經四時為紀蔡

邕崔夫人誄昔在敬姜陪臣之母勞謙紡績仲尼是

紀偕苟起切

按淮南子以下原本脫去四十四字

楚辭九辯四時遞來

而卒歲兮陰陽不可與儷偕

按原本儷誤作儷

白日晚晚其

將入兮明月銷鑠而滅毀太元親首次三失其體也

次四賓主偕也餘見豐年詩

爾雅釋山云多草木

岵無草木屺而是詩毛傳曰無草木岵有草木屺孔

疏云當是傳寫誤也毛傳曰旃之也季小子也行役

者登岵山望父之在所思父臨行謂已曰嗟予子行

役早夜無有已時閔之也又戒已曰上慎之哉今俗亦曰上役上番上陣卒曰獨當來歸不至永止于彼而不反也無止即無死之微辭也無寐閔其不得寐也無棄我亦祝其無死之微辭也必偕戒之必與衆偕慮其以後期獲罪也無死謂其母過于勇而必死也毛詩序曰陟岵孝子行役思念父母也國迫而數侵削役乎大國皆詩外之贅辭也不知父母兄弟之至情乃天下之大道故為是贅也

十畝之間兮桑者閑閑兮行與子還兮十畝之外兮桑者泄泄兮行與子逝兮

閑補音何甄切

按原本三字脫

揚雄太僕箴閑與愆叶曹植

瑟瑟歌閑與然叶簡觀今京語率如此蓋今京語之餘音如軒而補音遂何甄則又過之矣還本亦作旋李翱答進士王載言書作旋釋文間間亦作閑字

本亦作間間暇也惟有間故寬暇後世以中間之間與閒暇之間渾轂故假借防閑之閑以寄其音實非

古字采桑者雖閒暇然采者多故曰閒閒只十畝之間桑者之多若是故道途中謀居相宅者相謂曰行與子迴還兮泄泄猶沓沓也亦多也行與子逝往兮言此處迫隘不可謀居而他往毛詩序曰十畝之間刺時也言其國削小民無所居焉若曰國以無道致侵削則可刺惟曰國削小民無所居則不可刺矣況詩中本無刺國之意衛宏不知道是詩無他亦無邪詠而歌之必不感人邪僻之情莫非道者宏不達是故

外推贅說

坎坎伐檀兮寘之河之干兮河水清且漣漪不稼不穡
胡取禾三百廛兮不狩不獵胡瞻爾庭有縣貆兮彼君
子兮不素餐兮坎坎伐輻兮寘之河之側兮河水清且
直猗不稼不穡胡取禾三百億兮不狩不獵胡瞻爾庭
有縣特兮彼君子兮不素食兮坎坎伐輪兮寘之河之
漣兮河水清且漣漪不稼不穡胡取禾三百困兮不狩
不獵胡瞻爾庭有縣鶉兮彼君子兮不素餐兮

餐補音卻正釋譏時獻一策偶進一言釋彼官責慰
此素餐輻說文以畐得聲許慎凡輻皆讀如偁荀子
引逸詩涓涓流水不壅不塞穀既破碎乃大其輻事
已敗矣乃重太息易林蹇之中孚曰登山伐輻虎在
我側簡案廣韻畐芒迥反簡疑輻芳逼切爾庶與今
讀不異母 檀木材之堅美者君子之美材似之有
美如此而寘之河干是不用之也毛傳曰坎坎伐檀
聲寘置也干厓也風行水成文曰漣伐檀以俟世用

若俟河水清漣孔疏云河水性濁清則難待襄公八
年左傳云俟河之清人壽幾何易緯云王者太平嘉
瑞之將出則河水先清毛傳曰種之曰稼斂之曰穡
貍獸名爾雅釋獸云貍子貍字林云貍似狐善睡其
子名貍郭云其雌者名𤝵今江東呼貉為𤝵𤝵字林
云𤝵狸類𤝵謂之𤝵廣雅云𤝵𤝵也然則皆貍之通
名而其間微有不同歟遂人云夫一廛田百畝孟子
曰下士與庶人在官者同祿祿足以代耕也中士倍

下士上士倍中士大夫倍上士小國之卿二大夫祿
其稅十一則十夫之稅始當一夫之獲下士祿一夫
中士祿二夫上士祿四夫大夫祿八夫魏小國卿祿
十六夫止當得百六十廛之禾稅今取三百廛為三
百夫其貪冒之狀著矣毛詩序曰伐檀刺貪也在位
貪鄙無功而受祿君子不得仕進爾孔疏云魯孫之
稼非唯種之也湯誓云舍我穡事非唯斂之也以稼
穡相對皆先稼而後穡故知種之曰稼斂之曰穡若

散則相通釋文云冬獵為狩又云火田為狩鄭箋云
宵田曰獵釋文云宵田為獠郭注云管子曰獠獵畢
弋今江東亦呼獵為獠或曰即今夜獵載鑪照也孔
疏云經云不狩不獵則狩與獵別故以獵為宵田此
對文耳散則獵通于晝夜狩兼於四時若周禮大田
獵王制云佐車止則百姓田獵不必皆宵田也素即
今俚語所謂白即毛傳所謂空之義也毛傳曰輻檀
輻也直直波也萬萬曰億獸三歲曰特鄭箋云十萬

曰億三百億禾秉之數孔疏云萬萬曰億今數然也
傳以時事言之故今九章算術皆以萬萬為億箋以
詩書古人之言故以古數言之知古億十萬者以田
方百里於數為九百萬畝而王制云方百里為田九
十億畝是億為十萬也楚語云百姓千品萬官億醜
皆以數相十是億十萬也秉把也聘禮注云秉謂刈
禾盈把是也毛傳曰檀可以為輪濬屋也小風水文
轉如輪所以釋淪也毛傳曰圓者為圉匠人注云圉

圓倉爾雅釋鳥云鷦鷯其雄鷽北庫郭云鷽鷽屬今
曰鷽鷽爾雅疏云鷽即上云鷽鷽母田鼠所化者鷽
舊說云蝦蟇所化者也毛傳曰熟食曰飧秋官掌客
云公飧五牢侯伯飧四牢子男飧三牢卿飧二牢大
夫飧一牢士飧少牢說文云飧水澆飯也宣六年公
羊傳曰晉靈公使勇士將殺趙盾入其門則無人焉
上其堂則無人焉俯而窺之方食魚飧孔疏云從夕
食言人旦則食飯夕則食飧鄭箋云飧讀如魚飧之

飧鄭志答張逸云禮飧饗大多非可素不得與不素
飧相配故易之也毛傳熟食即魚飧鄭徒為異鄭亦
有誤不止于是毛傳即非言飧盛禮飧牽乃生牢毛
曰熟食正得夕食本義所謂飧盛禮亦以充夕食爾
飧饗魚飧初無二義

碩鼠碩鼠無食我黍三歲貫女莫我肯顧逝將去女適
彼樂土樂土樂土爰得我所碩鼠碩鼠無食我麥三歲
貫女莫我肯德逝將去女適彼樂國樂國樂國爰得我

直碩鼠碩鼠無食我苗三歲貫女莫我肯勞逝將去女
適彼樂郊樂郊樂誰之永號

是詩言去之而適樂土則怨君可知也言碩鼠無食
我黍則君貪而重斂之狀可觀也碩大也大鼠謂君
也貫慣也重斂蓋三歲矣民積怨曰三歲重斂而民
輒從之致其習慣而不已又莫肯顧念我於是斷棄
曰誓將去女適彼樂土逝誓字之訛斂適樂土則得
所矣德者施德於我也莫肯施德於我也適樂國而

得其直則居是國為不得其直矣益以明重斂之非
理勞者閔其勞而勞之又莫肯勞我也誓將去女而
適樂郊誰復永號於女之土乎永長也不勝其苦而
長號也毛詩序曰碩鼠刺重斂也國人刺其君重斂
蠹食於民不脩其政貪而若大鼠也據此末章則勞
當如字有音去聲者乃後世欲別其義故特轉為去
聲其實古不轉音一字自有二義文勢自明

欽定四庫全書

慈湖詩傳卷八

宋 楊簡 撰

唐

蟋蟀在堂歲聿其莫今我不樂日月其除無已大康職
思其居好樂無荒良士瞿瞿蟋蟀在堂歲聿其逝今我
不樂日月其邁無已大康職思其外好樂無荒良士蹶
蹶蟋蟀在堂役車其休今我不樂日月其慆無已大康
職思其憂好樂無荒良士休休

邁力制切

按原本三字脫

說文以蔓得聲許慎讀蔓如厲孔

臧格虎賦都邑百姓莫不于邁陳列路隅咸稱萬歲

魏文帝述征賦邁與歲叶程曉贈傅休奕詩三光飛

景玉衡代邁龍集甲子四時成歲皇甫謐釋勸邁與

際與會叶蹶居衛反

釋蟲云蟋蟀

按原本三字脫

郭云

今趨織也一名蜻蛚楚人謂之王孫毛傳曰聿遂除

去也陸德明以除居為去聲殆不必也凡詩叶韻不

必平側同蟋蟀在堂矣歲其暮矣役車亦休矣今我

乃慘慘不樂日月除去歲事更新愈無休暇之時何
為乎不從容自樂又告之曰但無已太康樂足矣謂
無過於樂足矣又思其本職之所居者足矣好樂惟
不可荒豈有良士而瞿瞿然憂懼終歲乎瞿瞿驚視
之狀爾雅謂瞿瞿休休儉也爾雅徒因詩說言儉不
詳觀熟思其情旨遽謂之儉殊不可者爾雅踈謬多
矣此釋不可用書曰其心休休焉其如有容焉亦謂
之儉乎東方未明狂夫瞿瞿亦謂之儉乎蟋蟀乃晉

國之士相警切之詩而序謂之刺晉僖公誤矣平觀
本詩情狀昭然先儒倡說既誤後儒因之為序千載
之下牢不可拔嗚呼孟子於武成猶不盡信而後世
惟衛宏之序是從亦異乎孟子矣遂至於反以序病
詩三章三言良士若諷晉君何得每以良士為辭擬
人必於其倫人情之常也邁往也既思其居又思其
外周思內外足矣好樂惟不可荒豈有良士而蹶蹶
然急不少舒徐乎愒過也滔滔而過也思其所可憂

足矣何為乎終歲不樂好樂惟無荒足矣良士休休
其心常樂無憂無懼休休正言瞿瞿蹶蹶反言作詩
協韻初無定式意所欲言則言其淺陋之士始拘孔
叢子載孔子曰吾於蟋蟀見唐堯儉德之大矣故詩
序曰刺晉也而謂之唐本其風俗憂深思遠儉而用
禮乃有堯之遺風焉唐叔虞初封曰侯故曰唐而先
儒以後稱晉故疑而為說因附會孔子之言

山有樞隰有榆子有衣裳弗曳弗婁子有車馬弗馳弗

驅宛其死矣他人是愉山有栲隰有杻子有廷內弗洒
弗埽子有鐘鼓弗鼓弗考宛其死矣他人是保山有漆
隰有栗子有酒食何不日鼓瑟且以喜樂且以永日宛
其死矣他人入室

陸璣草木疏云許慎讀栲為糗今人言考失其聲也
爾雅栲山樗疏亦云許慎讀栲曰糗杻女九反洒所
懈反考補音考去九切

按原本四字脫

說文以𠂔得聲又曰

𠂔音糗范蠡曰上帝不考時變是守易林困之巽皇

考與飲酒叶萃之井考與白叶邊讓章華賦考與肘
叶保補音補苟切漢房中歌加被寵咸相保德施大
世曼壽韓愈路常侍墓銘保與咎叶 甚矣夫率然
輿論之暗合乎道也夫他人有入室之狀為國者宜
憂宜懼而是詩乃使之曳其衣裳馳其車馬考其鐘
鼓日鼓瑟者何也堯舜曰欽哉禹曰克艱皋陶曰兢
兢然而堯舜垂衣而治帝庸作歌則堯舜禹之憂非
憂悴無聊之憂也今晉君直憂悴無聊爾豈能治國

家故有宛其死矣之漸有他人入室之證永日猶終日也且得永長一日之樂也孔疏曰永日人而無事則長日難度若飲食作樂則可以永日是說謬甚學者惜寸陰學者百年如一日千古如一日奚永日之難度學不為已溺心文字故其陋至是毛詩序曰山有樞刺晉昭公也不能脩道以正其國有財不能用有鐘鼓不能以自樂有朝廷不能洒埽政荒民散將以危亡四鄰謀取其國家而不知國人作詩以刺之

也於君言刺大悖餘得之觀是詩當得其意非謂果
使晉君終日喜樂不憂思也國危如此奚可一日忘
其憂但不可憂悴無聊爾如以辭而已矣豈不誤人
國乎孟子曰說詩不以辭害志爾雅釋木云蔭莖郭
云今之刺榆疏引是詩為證榆之類有十種葉皆相
似皮及木理異耳釋木云栲山栲郭云栲似栲色小
白亦類漆樹疏引陸璣疏云山栲與下田栲略無異
葉似差狹耳此為栲者似誤也栲葉如櫟木皮厚數

寸可為車輻或謂栲櫟許慎正以栲讀為糗今人言
栲失其聲耳釋木云柎櫪郭云似棣細葉葉新生可
飼牛材中車輞關西呼柎子一名土樞陸璣疏云葉
似杏而尖白色皮正赤為木多曲少直枝葉茂好二
月中葉疏華如棟而細或謂之牛筋或謂之櫪材可
為弓弩幹也毛傳婁亦曳也愉樂也鄭箋云保居也
毛傳洒灑也考擊也孔疏云走馬謂之馳策馬謂之

驅

揚之水白石鑿鑿素衣朱襮從子于沃既見君子云何
不樂揚之水白石皓皓素衣朱繡從子于鵠既見君子
云何其憂揚之水白石粼粼我聞有命不敢以告人

鑿子落反襮字林方沃反沃補音鬱縛切其葉沃若徐
邈讀六轡沃若沈重讀郭璞沃民讚爰有大野厥號
曰沃鳳卵是吞靈膏是酌劉向新序夏民之歌沃與
樂字躋字叶易林震之屯曰揚水潛鑿使石潔白衣
素表朱遊戲臯沃得君所願心志娛樂正用此詩白

僕各切鵠補音居號切

按原本此三字脫

漢地理志鵠澤孟康

音告呂氏春秋鵠乎其羞用志慮也高誘音浩 歐

陽氏曰揚之水其力弱不能流移白石昭公微弱不

能制曲沃而桓叔之強於晉國如白石見於水中其

民從而樂之則詩文自見爾雅釋器云黼領謂之褾

郊特牲云繡黼丹朱中衣大夫之僭禮也大夫服之

為僭知諸侯當服之也鄭箋云丹朱為純也國人欲

進此服去從桓叔君子謂桓叔毛傳曰鵠曲沃邑也

說文曰水生厓石間曰粼粼考工記曰五色備謂之
繡白與黑謂之黼故鄭箋云繡當為綃毛傳曰褓領
也諸侯繡黼丹朱中衣沃曲沃也孔疏云繡是刺之
故繡為刺名繡刺以為黼孫炎注爾雅云繡刺黼文
以褓領是取毛繡黼為義曲沃欲并晉已有命令施
行聞而不敢告人懼禍及已也毛詩序曰揚之水刺
晉昭公也昭公分國以封沃沃盛彊昭公微弱國人
將叛而歸沃焉君言刺大悖也分國封沃非禮也國

人將叛昭公無德政也沃謀并晉大悖也是詩悼晉之昏惡沃之悖明民心之無常有國者不可以不慎也揚之水說見王鄭二揚之水

椒聊之實蕃衍盈升彼其之子碩大無朋椒聊且遠條且椒聊之實蕃衍盈匊彼其之子碩大且篤椒聊且遠條且

是詩憂昭公也知彼沃之盛強昭公將為所并憂而作是詩也曰彼其之子彼曲沃也其情主晉也遠條

且之餘有不言之憂而毛詩序曰刺晉昭公也失本情矣大悖也序又曰君子見沃之盛彊能修其政知其蕃衍盛大子孫將有晉國焉政者正也沃悖矣何政之有毛傳曰椒聊椒也孔疏引陸璣疏曰聊語助也崔靈恩集註謂古者為升上徑一寸下徑六分其深八分本草同呂曰古量二升曰斛斛大於升梟氏為量鬴耳三寸其實一升夫其外三寸其中小矣毛傳曰兩手曰斛鄭氏箋云椒性芬香而少實今一掬

之實蕃衍盈升鄭意謂一團云爾一團如球球者卷
曲若圓之勢椒聚生成球詩云有球棘匕蓋勢微卷
椒實成聚有球狀古升至小去爾太遠殆周衰古量
寢隳而寢大歟無朋匹言曲沃事勢碩大無與為並
也常情言多過實率類此遠條言雖遠條亦蕃盛也
凡枝條之遠者多不蕃盛此言遠條亦盛喻沃之盛
大若是也篤厚也言桓叔施德篤厚也而諸儒獨謂
喻沃子孫之盛不盡本詩之情椒聊喻沃勢盛大凡

百盡舉之矣非止喻子孫曰碩大曰篤義不止於子孫之蕃矣且語助也

綢繆束薪三星在天今夕何夕見此良人子兮子兮如此良人何綢繆束芻三星在隅今夕何夕見此邂逅子兮子兮如此邂逅何綢繆束楚三星在戶今夕何夕見此繫者子兮子兮如此繫者何

芻補音側九反轉為平聲則側鳩切韓愈駑驥詩力小苦易制價微力易酬渴飲一斗水饑食一束芻補

音側九切無據當從平聲

按吳棫韻補引韓愈此詩作初尤切亦從平聲讀

隅補音語口切轉為平聲則魚侯切易林候伺山隅

與憂叶家在海隅與流叶揚雄反離騷或鼻祖於汾

隅與侯叶補音語口切無據當從平聲

按吳棫韻補隅作魚侯切

引梁鴻詩隅與休叶亦從平聲讀者據此則補音與韻補亦微有異同抑必欲以蜀隅協返字耶者

補音掌與切史記秦瑯邪刻石無不臣者索隱音渚

楚辭九歌騫芳洲兮杜若將以遺乎遠者時不可兮

驟得聊逍遙兮容與王褒九懷天門兮地戶孰由乎

賢者無正道兮溷側懷德兮何覩司馬相如賦鼓巖
簿縱獠者江河為陸泰山為櫓易林離之剝曰從喬
彭祖西過王母道里夷易無敢難者韓愈元和聖德
詩并包畜養無異細鉅億載萬年敢有違者柳宗元
牛賦或穿緘滕或實豆俎由是觀之物無踰者薪
楚畧同漢廣云翹翹錯薪言刈其楚楚薪之整整者
說文謂刈草為芻綢繆纏束薪芻於野莫夜而歸見
三星在天焉言其著明者不必指心指參也在隅謂

在天之旁角在戶謂人在室中見三星當戶今夕何
夕見此良人此男奔女見此粲者此女奔男見此邂逅
乃適相邂逅而苟合者非初有定意也妻謂夫為
良人粲者美女之稱不必三女而後為粲今夕何夕
驚喜之辭也子兮子兮如此良人何以無素具無以
延之而以告人也亂世淫奔以為常故明以告人三
章指事不同知非淫者所自作詩人叙其惡而刺之
如桑中溱洧也而毛詩序言綢繆刺晉亂也國亂而

昏姻不得其時焉盖毛傳謂三星為參三星在天可
以嫁娶鄭箋又謂心星毛公亦多差誤穿鑿不可盡
信廣漢張氏亦曰若謂婚姻則不得稱邂逅

有杕之杜其葉湑湑獨行踽踽豈無他人不如我同父
嗟行之人胡不比焉人無兄弟胡不飲焉有杕之杜其
葉菁菁獨行裒裒豈無他人不如我同姓嗟行之人胡
不比焉人無兄弟胡不飲焉

裒音瓊本作梵又作煢姓補音桑經切

按原本三字脫說文

以生得聲左氏傳公孫生亦作姓古鐘鼎姓作生漢

童謠游平賣印自有平不避高賢及大姓

按原本印訛作

印避訛作壁

釋木云杜甘棠又云杜赤棠然今四明山

之東四地名曰杜其地杜花白以是得名然則曰杜曰

棠通稱歟爾雅亦多差悞杜盛也其葉滑滑菁菁獨

行於道者蹢蹢震震

按原本二字脫

無依無親不如杜枝葉

相比之盛豈無他人不如同父之兄弟相親相比之
為美也嗟行道之人胡不比焉意謂非親故不相比

也人無兄弟胡不相攸助意謂非兄弟故不相攸助
明惟親屬乃相親相助毛詩序曰杖杜刺時也君不
能親其宗族骨肉離散獨居而無兄弟將為沃所并
溺

羔裘豹祛自我人居居豈無他人維子之故羔裘豹裘
自我人究究豈無人維子之好

鄭箋云羔裘豹祛在位卿大夫之服袖口曰祛鄭風
羔裘豹飾又云邦之司直則知羔裘豹飾其袖卿大

夫之服也自以我為我人為人人居居然無相親愛之意居居有倨之意居止也居居蓋嚴冷不相親之狀豈無他人可事維子之故故舊也其自乃祖乃父以來相依承之久而不忍輕去之歟究極也究究言其人我截然之極也言嚴冷無以復加也好舊好也是詩其家臣所作歟毛詩序謂晉人刺其在位不恤其民本詩辭情不然

肅肅鵠羽集于苞栩王事靡盬不能蓺稷黍父母何怙

悠悠蒼天曷其有所肅肅鵠翼集于苞棘王事靡盬不能藝黍稷父母何食悠悠蒼天曷其有極肅肅鵠行集于苞桑王事靡盬不能藝稻粱父母何嘗悠悠蒼天曷其有常

毛詩序曰鵠羽刺時也昭公之後大亂五世君子下從征役不得養其父母而作此詩也是詩惟憂念父母爾初無刺時之情毛傳曰肅肅鵠羽聲也集止苞稌相杼鵠性不樹止爾雅釋言云苞稌郭云今人呼

物叢緻者為積

按原本緻字脫今補

孫炎曰物叢生曰苞齊人名

曰積釋木云栩杼郭云柞樹也陸璣疏云今柞櫟也

其子為皐或言皐斗其殼為汁可以染皐孔疏云鵠

鳥連蹄性不樹止樹止則為苦毛傳曰監不攻緻也

怙恃也鄭箋云藝樹也孔疏云監與蠱字異義同毛

傳曰行翮也疏云以鳥翮之毛有行列也曲禮曰稷

曰明粢郭璞云今江東人呼粟為粢釋草云藁赤苗

苞白苗郭璞注云赤苗今之赤粢粟白苗今之白粢

粟皆好穀靡盬者不蠱壞王事不蠱壞以勤勞故也
故世以靡盬為勤勞無暇之稱惟勤勞無暇故不及
種藝黍稷稻粱今俗語云不能得藝稷黍既不及藝
黍稷則父母何所恃以為食嘗猶食也箋云曷何也
何時我得其所哉至于極則止矣曷其有極言無極
則勞役無已常平常也曷時復常也周平王常使虢
公將兵伐曲沃莊伯桓王又使虢仲伐曲沃其以晉
迫于王畿故王命行焉而有王事

豈曰無衣七兮不如子之衣安且吉兮豈曰無衣六兮
不如子之衣安且燠兮

按此篇永樂
大典缺卷

有杖之杜生于道左彼君子兮噬肯適我中心好之曷
飲食之有杖之杜生于道周彼君子兮噬肯來遊中心
好之曷飲食之

杖杜有華焉況生道左人所遊觀喻晉居五達之地
武公始并晉國禮士方急故四方士君子悅之噬肯

適我噬決然之意噬物必決之故曰噬歟決然欲來
仕於晉國武公中心好之曰何以飲食之曷何也好
士之情如此故詩人美之述之而毛詩序曰刺晉武
公也武公寡特兼其宗族而不求賢以自輔焉者盖
以生於道左疑其特生孤立之狀故起斯義而二章
辭情大體不然殊覺有美之之意毛傳亦初無寡特
之意亦有美意惟衛宏妄起序說盖宏不思華生道
左人必遊觀之情武公戒晉則罪矣而得士心此以

臣美君正也武公并晉二年而卒其勤勞禮士之心
宜朱遽衰序差繆若此類多矣不可盡信道周周繞
回曲處也又周行亦道路之別名

葛生蒙楚蔽蔓于野予美亡此誰與獨處葛生蒙棘蔽
蔓于域予美亡此誰與獨息角枕粲兮錦衾爛兮予美
亡此誰與獨旦夏之日冬之夜百歲之後歸于其居冬
之夜夏之日百歲之後歸于其室

婦人嫁而從夫所託者夫而已如葛生蒙楚必託楚

而生如薇蔓于野必託野而生無楚葛何依無野蔓
何託楚薪也陸璣疏曰薇似枯樓葉盛而細其子正
黑如燕薁不可食也幽州人謂之烏服今四明亦有
之謂之老烏服藤有二種有其子白者鄭箋謂所美
謂君子也予之美者今亡此矣言其夫亡也亡其所
依託故以葛薇為喻亡夫則獨處矣誰與處乎言無
人以伴其幽獨也息休息也夫亡則獨息爾誰與伴
休息乎夫亡則獨寢以達旦矣誰與伴寂冷乎誰與

獨息誰與獨旦皆憂思其夫之情也必曰獨者寡婦
義當守獨故每以獨為言夏之日冬之夜毛傳曰長
也鄭箋云思者於晝夜之長時尤其居墳墓也又云
室猶塚壙言此者婦人專一義之至情之盡謂終當
同穴祔葬也陳風防有鵲巢云誰侑予美此予美指
其君也蓋謂予所美愛者吾君也誰為讒言以侑誑
吾君聊以彼通此則此予美謂夫也詩序曰葛生刺
晉獻公也好攻戰則國人多喪矣夫本詩婦思其夫

也衛宏不知夫婦之道正大故外推其說以及於君
焉既失詩人之情又失先聖之旨

采苓采苓首陽之巔人之為言苟亦無信舍旃舍旃苟
亦無然人之為言胡得焉采苦采苦首陽之下人之為
言苟亦無與舍旃舍旃苟亦無然人之為言胡得焉采
葑采葑首陽之東人之為言苟亦無從舍旃舍旃苟亦
無然人之為言胡得焉

巔補音典因切說文以巔得聲集韻巔典音切王褒

洞簫賦巔與根叶易林比之解曰耕石山巔費種家
貧隨之明夷曰日在阜巔鄉昧為昏小人成羣信補
音斯人切為如字下同封音封 毛傳曰苓大苦也
釋文曰即甘草葉似地黃首陽山名也釋草云藟大
苦郭璞注云今甘草也據毛傳則苓字訛歟凡詩音
存字訛者多毛詩序言獻公好聽讒言夫讒言必為
可采之狀無可采之狀則何以動其君讒言不一以
利欲誘其君則似藟之甘以禍患懼其君則似苦既

以甘誘之又以苦恐之則君無不從其終將痛攻善
良其厲虐似葑之辛葑芥也其生于山者尤辛辣今
俚語言人之嚴厲曰辣首陽山在河東之蒲坂縣南
詩人即所見以入詠山有人君尊高之象曰巔曰下
曰東亦兼寓意乎讒言不離君之前後左右必隨依
君意而入之歟詩人忠告曰讒言誠有甘苦可采之
狀苟亦無據信舍之舍之旃之也然是也苟不以為
是而舍之則人之為讒言者亦何所得焉無所得則

止矣茯苓雖生山中而深必掘地深入乃可取此言
采則非也沉苦與葑皆菜則苓者當亦菜也故從毛
傳

